

SIARAN MEDIA BERSAMA

Kuala Lumpur, 26 Februari 2024

SC dan Bursa Malaysia Ikrar Kelulusan IPO Lebih Cepat untuk Pasaran Utama dan Pasaran ACE

Suruhanjaya Sekuriti Malaysia (SC) dan Bursa Malaysia Berhad (Bursa Malaysia atau Bursa) telah bersama-sama menyatakan komitmen untuk mempercepatkan tempoh kelulusan untuk tawaran awam permulaan (IPO) di Pasaran Utama dan Pasaran ACE kepada tiga bulan.

Komitmen tersebut terpakai untuk permohonan IPO baharu yang diterima mulai 1 Mac 2024.

Komitmen untuk keputusan segera mengenai kelulusan dalam tempoh tiga bulan ini adalah bersandarkan Penasihat Utama/Penaja memberi jawapan yang memuaskan dalam tempoh lima hari pasaran bagipertanyaan dan ulasan pengawal selia terhadap permohonan IPO .

Ini di samping amalan pengawal selia sejak tahun 2021 di mana pertanyaan dan ulasan dikeluarkan dalam tempoh sepuluh hari pasaran berikutan permohonan IPO yang lengkap, serta mengutarakan pertanyaan dan ulasan seterusnya dalam tempoh lima hari pasaran untuk setiap pusingan maklum balas.

Pengawal selia akan terus mengekalkan ketegasan dalam penilaian, tanpa menjaskan perlindungan pelabur dan kepentingan awam.

Berikutan kerjasama yang lebih kukuh antara pengawal selia dan pemain industri untuk menawarkan garis masa yang lebih jelas untuk penyenaraian bagi pemohon IPO yang layak, pengawal selia berharap dapat menarik syarikat berkualiti untuk disenaraikan, terutamanya dalam sektor yang menyokong dasar pertumbuhan negara, pelan tindakan atau pelan hala tuju.

Pengerusi SC Dato' Seri Dr. Awang Adek Hussin berkata, "Pasaran modal ekuiti Malaysia kekal sebagai asas pembiayaan bagi syarikat-syarikat, dengan IPO menjana dana sebanyak RM3.6 bilion pada tahun 2023."

"Kami percaya tempoh masa kelulusan ini mampu memenuhi keperluan perniagaan dinamik syarikat yang ingin mengumpul dana dalam pasaran modal, dan ianya sebahagian daripada usaha berterusan kami untuk kekal relevan dan berdaya saing kepada pelabur tempatan dan antarabangsa," katanya.

"Usaha kerjasama ini menandakan komitmen kami untuk memupuk persekitaran yang kondusif bagi syarikat-syarikat, sekaligus memudahkan akses mereka kepada pasaran modal dengan lebih kepastian dan kecekapan," tambahnya.

Datuk Muhamad Umar Swift, Ketua Pegawai Eksekutif Bursa Malaysia berkata, "Masa ke pasaran yang lebih kompetitif akan meningkatkan daya tarikan Bursa kepada syarikat yang ingin tersenarai di Malaysia. Kami berhasrat untuk menyediakan kemudahan holistik dan mesra pelanggan oleh pengawal selia dan Penasihat Utama/ Penaja, untuk memberi sokongan yang lebih baik kepada syarikat yang ingin mengumpul modal melalui IPO serta meningkatkan status sebagai syarikat tersenarai awam. Pasaran ekuiti bersedia menyokong kitaran pengumpulan dana dan pelaburan, bagi mengembangkan perniagaan."

Persatuan Perbankan Pelaburan Malaysia (MIBA) berkata ia mengiktiraf kepentingan kerjasama yang lancar antara pengawal selia dan penasihat untuk memastikan proses penyenaraian yang lancar.

"Melalui kerjasama erat, kami boleh mempertahankan piawaian usaha wajar (*due diligence*), tadbir urus korporat dan pematuhan di tahap tertinggi, ke arah memudahkan masa ke pasaran yang lebih pantas untuk penerbit IPO," kata Pengurus MIBA, Lee Jim Leng.

"Ini bukan sahaja memberi manfaat kepada perniagaan yang ingin mendapatkan modal tetapi juga meningkatkan kredibiliti dan ketelusan keseluruhan pasaran modal," tambahnya.

SC dan Bursa Malaysia berkata penasihat dan profesional perlu mengekalkan piawaian usaha wajar untuk memastikan permohonan IPO berkualiti tinggi yang mematuhi garis panduan dan keperluan, pendedahan berkualiti, standard tadbir urus korporat yang tinggi, serta respons yang tepat pada masanya dan memuaskan kepada pertanyaan dan ulasan pengawal selia.

Langkah-langkah selanjutnya, termasuk modul latihan akan dibangunkan untuk menyokong profesional pasaran ke arah memenuhi objektif bersama, iaitu perjalanan yang lebih lancar ke IPO.

SURUHANJAYA SEKURITI MALAYSIA BURSA MALAYSIA BERHAD

Mengenai Suruhanjaya Sekuriti Malaysia:

Suruhanjaya Sekuriti Malaysia (SC), sebuah badan berkanun yang melapor kepada Menteri Kewangan, ditubuhkan di bawah Akta Suruhanjaya Sekuriti 1993. Ia merupakan agensi kawal selia tunggal bagi pengawalseliaan dan pembangunan pasaran modal. SC mempunyai tanggungjawab langsung untuk menyelia dan memantau aktiviti institusi pasaran, termasuk bursa dan rumah penjelasan, dan mengawal selia semua individu yang dilesenkan di bawah Akta Pasaran Modal dan Perkhidmatan 2007. Maklumat lanjut mengenai SC boleh didapati di laman sesawangnya di www.sc.com.my. Ikuti SC di saluran media sosial kami @SecComMalaysia untuk maklumat lanjut.

Tentang Bursa Malaysia

Bursa Malaysia merupakan syarikat pemegangan bursa yang diperbadankan pada tahun 1976 dan disenaraikan pada tahun 2005. Ia telah berkembang sebagai salah sebuah bursa terbesar di ASEAN. Bursa Malaysia hari ini beroperasi sebagai bursa pelbagai aset dan mengawal selia pertukaran bersepadu sepenuhnya yang menawarkan rangkaian komprehensif pelaburan, penjanaan modal, dan

kemudahan berkaitan pertukaran. Bursa Malaysia komited kepada misinya untuk 'Mewujudkan Peluang, Meningkatkan Nilai' bagi pasaran modal, ekonomi dan masyarakat Malaysia. Ketahui lebih lanjut di bursamalaysia.com.

Untuk pertanyaan media, sila hubungi:

Suruhanjaya Sekuriti Malaysia

Jabatan Hal Ehwal Korporat
Delyana Nordin
+6012 2072787 | cau@seccom.com.my

Bursa Malaysia

Komunikasi Strategik Kumpulan
Dominica Chin
+6012 2170245 | dominica@bursamalaysia.com